

石

巢

詩

集

石巢詩集序

予友甯鄉程君子大最錄近所爲詩凡十二卷石巢詩集集將以續楚望閣編之槩而諉予綴語簡端且曰石巢山谷老人敘晏叔原詩謂其癡絕人所論四癡於予畢肖君盍仿其例爲予導言予曰唯唯否否天下惟不癡者乃能癡人今之癡莫予若不自醜予癡顧嚙嚙然且君是癡則予之癡尙有瘳耶雖然惟癡始知癡亦惟癡善言癡自儕俗矯飾以爲知桀黠以爲巧於是喬宇嵬瑣之徒得挾執詐術以邀當世一切譽問榮膺彼其人皆自謂不癡者也吾未知涪翁所謂不癡校此奚如觀其

論屢一則曰仕宦連蹇不能一傍貴人之門再則曰文自有體不肯作時俗語吾烏知乎其癡之耶其非癡之也且烏知乎癡者之非不癡不癡者之非癡也又烏知乎癡者之不猶愈於不癡也予大仕鄂有年嘗監湖北工學制新器以前民用爲楚督張文襄修築武昌金口大隄及三新磯繼復創辦紙廠昕履宣防夕督營繕方搏心揖志以奔役事功文襄旣去當事中蜚語頗繩引根批之君審然不爲之闕就所居鶯坊巷宅磊石爲巢雅擅巖穴池館花竹禽魚之勝其子弟群從旣皆文采風流旁及姬侍姻連多能拾綺藻通聲律每夏之日冬

之夜相與調絲品竹含宮咀商極嬰跚敦翠之娛君湛
然不爲之涵又以佳日招集賓朋流連觴詠醉則吮毫
拂紙畫石題句以吐其旁薄輪囷酣嬉淋漓之狀態凡
石巢之會予且什七八從也旣兵燹後園宅易主巢痕
亦藁滅煙銷不可尋憶君超然一不以去來膠其心蓋
其情迹高曠物物而不役於物故其爲詩亦盧牟六合
甄陶百家沖澍滉漾發攄旬朶而不與世境爲推移也
夫太虛之間有真有幻有傭有畸有常有變泮渙搏翕
如環無端人而天者也惟知人之天者能幻能真能傭
能畸能常能變知天之天者無幻無真無傭無畸無常

無變無幻無真無備無畸無常無變則大浸稽天而不
溺大旱金石流土山焦而不爇邈然與造物者爲徒且
不知人間世之謂何況詹詹小知大知之辨耶茲編後
楚望閣詩之出又十數稔不懈而進乎古蓋稱其年海
內久膾炙君詩匪段予一二談特因其詩而得其遭知
其變之無廷乎正庶乎始義之遺云爾壬子秋八月善
化楊觀圭

王湘綺翁序予環中廬詩稱比者程子大以詩酒豪
而未見顧印伯詩兩君多與環中倡和蓋將奪鄧王
之席變湘聲爲夏聲者且一變清詩合唐宋而治之
乎予既寫定此序附著王語以告讀子大詩者乙卯
二月觀圭又注

石巢詩集總目

十髮居士全

卷一

辛丑

光緒二十七年

古今體詩五十二首

附錄

詩四首文一首

卷二

壬寅

光緒二十八年

古今體詩五十五首

附錄

詩九首文一首

卷三

癸卯

光緒二十九年

古今體詩六十六首

卷四

甲辰

光緒三十年

乙巳

光緒三十一年

丙午

光緒三十二年

古今體詩四十二首

卷五

丁未

戊申

己酉

光緒三十三年至宣統元年

古今體詩六十二首

卷六

庚戌

宣統二年

古今體詩五十一首

卷七

辛亥

宣統三年

古今體詩五十二首

卷八

己酉五月至辛亥九月

畫石絕句一百二十首

卷九

庚戌

閒山社詩四十首

附錄

三十九首

卷十

辛亥

分韻詩一首 附錄 詩七首

卷十一

江風集連句詩上六十四首

卷十二

江風集連句詩下五十七首 附錄 詩五首

都古近體詩六百六十二首

附錄 詩六十五首文二首

石巢詩集卷一

甯鄉程頌萬子大著

看花五首

花意如人家爭紅向庭誇奇媽妙天製開落心無它心
高瓣不完留枝送年華語郎休觸撥管取來春花
游蜂覩花房逢折過別枝亦知生意薄及此嬉春時池
旁多謝風吹落不在泥垂死有餘清諒哉蜂毋欺
園花傲闌花遜此風日美土膏吾所專束縛汝竊比風
動不自防雨過欣屢起安得時美人來嫁野君子
好月不自美在花逾皎然穿牕忽移時流照無私偏花

性不妒月況當生人前房櫳惜無多又值初上弦
花時競歡宴花落無一人儻非糞壤勞那寤便娟親西
子蒙不潔忍儕東鄰顰老矣畏學圃銜杯語停辛

春日示姪鰲

草堂臥病春自喜篠竹塢花嬌可憐雖無長公來着屐
幸有小阮吟隨肩牆頭胷柳晚虹見籬落破筍朝雷顛
十年欣汝得慰藉不逐春物耽時賢

過上林寺讀寄禪四明山水詩卻贈

廿年飛錫去江東半偈河山慣聽鐘鎖夢蓮花洋裏月
行吟舍利塔前峰雲間盆鉢晴收芋雨後袈裟晚曬松

海水天風憑定力赤城深處倚茅龍

攜琴重過遠公房病骨經秋尙倔強太白峰頭問童子
元黃劫外禮空王振衣海色低窮髮洗鉢詩心入大荒
解識參寥文字厄獨憑行腳寫蒼茫

和子大見贈次韻二首

附錄

釋敬安

十載游踪徧浙東海濤翻雪吼洪鐘蒲帆泛月尋幽
島竹杖挑雲入亂峰最憶普陀浮海刹難忘舍利放
光松報君一語君應怖曾向空潭咒毒龍

四明深處舊禪房海色由來夢裏蒼太白峰爲山所
祖大龍湫是瀑之王煙霞有約愁難踐松菊無人想

就荒今日因公話吳越萬重雲水自茫茫

題沈伯華城南老屋圖四首

經廬喬木秀歸詠引清篁老屋得如此城南胡可忘吳
趨驚落月楚甸感餘霜圖謀烏衣在披尋尙此鄉

風雨郎潛夕論交憶上京吏才高楚寶吟闕和秦聲列
嶠風煙偏勞生感慨平年時偕問字兩鳳有清名

兩郎從余

學受

勝日駕湖槳清秋鵲渚尊干戈滿眼急書劍一身存截
竹閒支幌穿簾欲護門毋勞問隱顯迴睇子山園
亦有吾廬竹疏燈引夢深期君商榷地未竟草元心薜

篆雙鈎帖雲衣百衲琴披圖一吟望吾道幾銷沈

送洪主事汝冲赴西安行在兼懷檢討汝源五首
三星跂庭隅九關阨雲中瓊梯亘霄漢攬衣不能從美
人中夜泣眾女若爲容互躡王母駕遺君滄海東枯桑
挂鯨鯢大陸薶魚龍衣冠蘖街血寶玉椒房烽

披腹叫天閭懷沙渺千里安知六飛駕遂入殽函裏中
衢扇妖蠱鬱煜紅燈起相公專廟堂安用讀書子醉見
皆兒嬉腥聞異冠履歸來夫何言祚命付諸理

疇昔二三子金臺耀文章一朝風日晦披髮趨南荒翹
尾覓芻秣長嘶戀車箱妻孥紛挐提父老各扶將問訊

東歸塗叢及驅犇蝗十里一壇壝神靈鬱相望五里一
斥堠劫掠無官商但識多財亡不知法與綱公孤額手
賀縣官涕淋浪吾儕徑寸翰僚底悲踰踰襪恍歸羽
島沸天茫茫

翰林軫阿兄歸歟慟麻衣結轡君父仇虹鞠當霄飛里
中數賢豪君季殊炳離嗟君一何爲眠着枰上棋出獻
政事疏入補陔華詩還君唁望室日烈風翻幃

大風揚征帆促子西北羣江樓奉卮酒一一酬所親愚
者嘿不聞志士徒鷹麟丸泥匪可塞橫目無調人皇仁
惟養晦璽書告強鄰三輔劓荆棘九列鉏紆昏願子涉

時艱苦懷覲一伸睽睽腰匣劍鬱鬱潼關門泰岱扶中
頽黃河挽東犇人存國再舉率土熙回春

題廬山歸宗寺所藏宋牧仲先生小像

圖像東南幾盛名匡山晴翠踏溪行未知玉帶留何處
廬山有碑曰宋大中丞留帶處但掃磐陀供寫生梁苑雪深曾沒馬官
亭春早記聞鶯持歸國故僧寮底難遣蕭條異代情

題梅林校藝圖二首

并敘

光緒二十七年十一月八日考試自強學堂諸
生畢業是日恭聞 兩宮聖駕還京講舍紅梅
盛開卽席賦詩諸生和者數十人越歲癸卯夏

予赴 召試黃伯薌蔡耐庵兩君合寫梅林校
藝圖寵行時則畢業諸生已多赴歐美游歷及
調赴南北洋各省充教習譯員矣頃歲尙書管
學張公百熙奏稱近年各省開辦學堂著有成
效者以湖北自強學堂及南洋公學爲最予薄
劣掌校最久然非南皮官保任之專而信之篤
烏能致是因於金陵舟中題二詩以質同徵諸
子索和焉

楚澤梗枿挹古芬晴軒藻豔失鑪薰荆襄之域疇人傳
斯邈而還異國文五載丹鉛期絕業並時鸞鶴有同羣

中興江漢澄清頌攬轡欣看出岫雲

橫舍官梅絳雪天座間桃李劇欣然星球鼇奠同文日
豐鎬龍飛大有年東去江流誰挽逝西來天演可無傳
抗顏養拙慚經歲心競還輸着祖鞭

梅林校藝圖跋

附錄

臨桂

況周儀

夔笙

光緒己亥庚子間子大太守弟提調荆湖強學余分
斟俄德文齋是爲吾兩人蹤跡合併之始余於中西
教術能麤舉條目子大實左右引翼之越歲辛丑于
役蜀東遂主萬縣白巖學堂講席略仿強學日程以
課白巖諸子久之成效少著猶吾子大之教也癸卯

冬月返權武清強學諸生經客歲奏辦畢業各挾所
長出而爲國家效尺寸之用子大實始終裁成錫鑄
之心力爲之交瘁而唯余知之甚深也強塾舊有梅
花百本曩勦試卒業值花盛開而余白巖講院亦有
梅百數十本綠萼多至三十本約計是時亦在暗香
疏影中昔人云隔千里兮共明月吾兩人隔二千里
而共梅花尤奇白巖諸子多勤樸邁往之士聞余稱
道強學成績不置舉欣欣然有志就學鄂垣指顧三
峽春融必有擔簦負笈來游伊川之門者子大試進
而教之安在不爲強學後來之秀也歲云莫矣余將

東下訪半塘於揚州儀董學堂子大出此冊屬題倚
袞書此爲自強卒業諸子慰並爲白巖來學諸子勸
快雪新霽春芳盎然早梅又將花矣顧安得尊酒論
文共子大素心晨夕如已庚合併時耶

題李文石單于和親碑二拓本 碑文曰單于和

親千秋萬歲安樂未央爲潘文勤藏後歸山陰
陳石安其陰文爲磚范出蔚州代王城旬齋尙
書奉使張家口所得庚子五月天津拳匪之變
文石舊藏盡失此紙爲其姬疊置鏡匣中與俱
南舟次滄洲遇拳匪搜牢擊破脂盃遂泯紅跡

幸不斷爛

金仙辭漢不能守李侯攜家正狂走圖書彝鼎並淪棄
賴有賢姬護文字兩磚吉語陰陽分鄭奩匱齋昔所珍
繫君嗜古得雙拓字畫蒼黝雲雷文代王城頭識遺刻
島沸茫茫星斗滅先朝寶物歎消沈豈獨瓊椎薤浩劫
武昌楊柳籠青春玉關西笑方和親千秋萬歲說安樂
都付東西南北塵齋頭別廩烹新茗爲君拂拭新題本
約略燕脂塞上痕燈前來鬪昭君影

題錢知縣葆青所藏漢熹平鏡拓本 鏡徑六寸

略無殘蝕持向日中能見鏡背四指銘曰熹平

三年正月丙午吾作尙方明竟廣漢西蜀合涑
黃白白利無極凶得光明賈人大富長子孫延
年益壽長樂未央予王仁俊釋賈爲賓楊守敬
釋爲賓以蜀中賓人起自秦漢盛於魏晉或其
族所製云時匄齋中丞亦藏漢元興鏡銘詞作
元興元年五月丙午日凡七十六字漢鑄鏡取
火德故多以丙午日此出襄陽城南二十里獨
樹村卽水經注之廣昌里錢君其里人得之古
壙中

土花未蝕熹平物獨樹邨遙漢水西曾照舞鸞青玉案

相逢走馬白銅鞮
賓人吉語長生籙
祕省新詩彩筆題
堪續宣和舊圖譜
元興丙午得重稽

題旬齋尙書藏周諫敦拓本 敦出武功縣扶風

邨王仁俊捍鄭爲之釋銘曰唯五年三月初吉
庚寅王在周師康宮旦王格太室卽立司馬共
右肅入門立中廷王呼內史年冊命肅曰先王
旣命女嗣王家女某不右毋敢不善今午唯國
嗣命錫女勒肅拜稽首敢對揚天子不顯休用
臣朕文考寶尊肅其萬年子子孫孫永寶用凡
九十六字

康宮太室百銘存落日扶風駐馬邨諫拜逸文蒐地寶

頡書探道仰天根三千花寶南樓宴

時值尙書世母巴特爾太夫人壽

六一文章北斗尊椎拓應心箝在口武功瓊藻照乾坤

題甸齋尙書藏建初買地玉券拓本 券長二寸

三分有奇寬一寸四分厚四分文曰建初六年

十一月十六日乙酉武孟子男靡嬰買馬哭宜

朱大弟少卿家田南廣九十四步西長六十八

步北廣六十五步東長七十九步爲田廿三畝奇

百六十四步直錢十萬二千東陳四比北西

南朱少比分時知券約趙滿何非沽酒各二千

晶瑩分明佐體書雲中古物劫灰餘炎靈莫數興王烈
幾度人間有玉魚

易璧差同十五城石家奴券共分明中興江漢蒐遺寶
髣髴開元字太平

琢刻何如建武年江都文字有真詮更觀華嶽長垣本
願錄他年眼福編是日觀宋牧仲先生藏華山廟碑缺十字本並國初以來諸老題跋

題黃左臣秦及釋文 匋齋尙書藏秦器徑三寸

有兩耳銘四字曰易十升洧左臣釋及爲器謂
詩我姑酌彼金罍姑卽及蓋小酒器也以及酌
酒於罍釋凡五六百言甚新稿

魯東門外哭萊田留得先秦器宛然從此及
黃生詮釋補遺箋

媚古眞成一字師尙書藏器有新知平陽證取侯家物

髣髴王郎說劍時

王揖鄭謂金石索所載平陽侯度爲易之反文

漢江江水濃於酒武昌之魚買之柳錄別惟應盡一及
祖龍天地休回首

座客風流畢阮倫兩當豪氣壓先民尊前易觸滄桑感
識字憂患復幾人

題甸齋尙書所藏阮文達公手拓上谷府卿墳壇

居攝二年刻石

上谷鐫珉紀居攝選樓翠墨有遺編武昌賓從論文夕
更續風流一百年

題家道存太守單于和親碑拓本四首

層城落日繞飛狐戈壁清秋萬馬呼遺璧和親舊行館
土花紅似漢宮無

紫臺翁主泣黃昏寥落千秋古篆存猶有鄭盦遺范在
西風殘醉訪吳門

編成漢上題襟集重見陶公運甓來篆勢乍同開母闕
功名猶想白登臺

漢篆除碑額外惟嵩山三闕及三公山碑與此碑字體相似

篁墩編系偕吾子述古論文共節樓慰喜尙書八埒在

風煙銷盡海東頭制齋藏漢八碑平面書勢適美皆奉使張家口所得庚子拳變八碑窖藏京師此其一也

題漢龜茲左將軍劉平國治路記有小角石本

八分摩巖在伊犁拜城光緒四年拓傳內地有小角石數字者極少未幾是刻毀於回民不可復致矣匄齋藏本與予所藏本同

敦煌而後數沙南更有龜茲鑿空譚誰向拜城尋角石
關門八月柳鬢鬢

題王伯唐兵部殉節遺墨與中寶聯句

英山王子真丈夫幾年相見長安壚文章雄奇面目古

友朋交密襟懷疏萬萬人海裏三間屋斗粟囊錢常不

足每從燕趙覓屠沽日與荆高共歌哭鼎黑山戈挺橫

衢來九門宮樹騰烽霾朝官出走縣官涕有骨莫葬黃

金臺萬嗟嗟君一曹司耳腐儒竟爲朝廷死遭逢原不

類文山心跡早拚同止水鼎有母有弟天南疊寄書血

淚紛淋浪一身稊米尙自惜何有正氣扶朝綱萬妻亡

不娶身無嗣獨居久與枯僧似鑾輿曉及鴈門關忠魂

夜哭龍泉寺鼎我時臥病江之頭白虹夜貫江干樓知

君魂來覓遺稿起視庭樹風颼颼萬憶昔識君歲甲午

送我榆關淚如雨別君卽是庚子春豈料相思遂終古

鼎衡陽夏生示此冊行間字裏聲嗚咽畸人不作草間
生媿我徒爲字中蟲萬風簷展讀共嗟咨中有當年和
我詩故人慷慨多奇節怕引梅村絕筆詞鼎

再題伯唐遺墨追和丁酉春見贈韻

死或愈於別對之猶懍如小人方有母大事不能書落
雉催燈響驚魚聽梵疏歸魂二千里何世表邱墟

題子大通守洪澤揚颿圖卽送其官武昌

伯唐歿後詩文

散落無集附著
二首以俟蒐采

王鐵珊

太白死已久江淮光氣枯青天夜夜采石月意色悠
遠不可呼風騷細碎就衰歇惟見大地橫荒涂十髮

山人起南嶽洞庭奪得神龍珠幻作挂天百尺筆雷
 電怫怒爭奔趨長淮駭浪落睥睨醉眼瞥入青虛無
 片帆春影刷洪澤酒腸吞吐無全湖支祁鐵鎖恣欲
 掣一震常恐翻天樞羈懷浩蕩暗悲激雲海荒忽難
 乘桴中流放浪發高唱出水龍背青虹廬此湖達淮
 自宋世聲價落寞如鹽嫫或從河渠考興廢天濶往
 往藏桂苻山川體物信大博不遇豪俊終湮蕪乃知
 文人喜創作好與荒泊生華腴扣相真應笑葛亮不
 渡渭水南渡瀘中原伯王甚厭見故出宇宙基崎嶇
 不然程侯昔南驅道指大庾臨番禺縞仙翠嶺汎香

雪唳鶴夜眩晶璫瑜春風逐驛待詩客乃出古三天
子都淮行妙詠十五闕青蓮再世無別殊豈非湖神
獨戰勝帆力水底通蒼梧敬亭秋浦敢藉壓已看地
望齊亮瑜長吟我亦思飛越坐令淮甸雲煙辜少年
鄉里闕遠跼燕山南顧空嗟吁蒼茫直下萬古淚人
生磨滅眞非夫何處臨風弔峴首霜雪銳欲侵頭顱
瑟縮長安久乞米那復臣朔賢侏儒魯連之矢終童
繻意氣亦會風雲須山中幾輩賦招隱猿鶴謗怨無
由逋圖南大翅直萬里何事六月方搏扶

再贈子大別

附錄

王鐵珊

天涯只有別駐馬意何如況復新亭上深藏詛楚書
南圖鵬翅健朔吹鴈翎疏他日中原地荆襄肯並墟
爲錢仲仙題陳豪湖山話舊圖四首

蘇臺柳與西湖月底是平生未了緣今日逢君忽惆悵
南屏山下水如天

六柱船低四面花海鷗渾笑客移家寺門鐘動月初上
何處采菱雙髻丫

酒邊豪士有陳遵畫本湖山別樣新記得三潭留月處
滿湖香翠兩詩人

郎官湖水似西湖送客輕帆萬里孤長憶酒旗風笛外

月明清得一愁無

題李文石明湖秋泛圖四首

側帽尋秋過歷城
水光山色憶分明
荻花淒黯蘋花白
似妒歌橈有豔聲

冰魂凍損明湖月
飛上清秋太白樓
欲共騎鯨舊時客
夜涼吹笛海東頭

紅裙烏榜清游劇
歷歷湖光照鬢絲
別有銷魂忘不得
夜涼梳洗喚船時

鵲華山色小眉顰
底事湖山爲寫真
後海先河數宗派
才名爭讓李于鱗

題中實所藏蘭蘭柳柳畫扇二首

柳如是畫柳馬湘蘭畫蘭

捉搦蘭蘭柳柳邊舊時情盡不吹綿兩番金粉滄江淚
灑作人間扇子仙

孔雀庵居誰得伴絳雲樓偈恨無知天邊乞借吳剛斧
斫盡秦淮柳萬絲

題馬湘蘭疏竹幽蘭圖二首

旖旎蕭森西復東半招郎袖半招風不知何世笑爲別
斜抱墨魂搖太空

薛素林香點染頻幽蘭死後更無春時無可再花還再
忍耐王郎幾後身

畫有薛素林秋香題詩又王伯谷題詩云大抵情緣終不改來生還要

郎嫌王

題李文石藏朱笥河先生煙雨樓詩卷

樓在涇縣

水西詩卷清游絕朋酒溪山替寫真
皖浙湖樓並煙雨弟兄竹石兩名臣
擁騶談藝知能暇縱筆停杯若有神
髣髴披吟在清祕却餘西望涕盈巾

送向一中之桂林學幕

字仲璜巫山人

萬里雲山象郡通別懷牢落感才雄
生涯文字高唐賦去國帆檣破廟風
斫地歌成斑竹裂極天波賈海桃紅
豪情睥睨還追惜聊覆深杯翫髣同

石巢詩集卷一終

石巢詩集卷二

甯鄉程頌萬子大箸

秦權歌上匄齋尙書撫軍

三十六郡權可一刻權出自臣斯筆三十六年權已移
祖龍不死將何爲刼餘今得五權並乃出托活洛公之
審定座中高下圖崑崙大者如槃小如鏡易制同鑄廿
六年銷兵鑄作臨洮仙咸陽豪傑十萬戶戶戶皆有贏
皇權歉疑明壹文可讀法度量則工毋偏諸權刻始皇
二世詔辭各
一歎者少疑通僣僭也
器則作實字訓考工記
嘉量維則又漢書律歷
志有五
則皆後來炎漢踵秦律
石鈞斤兩銖皆然漢書
律歷志
可證
權有五等

是知上蔡富刀筆倉籀辟席莫敢前石權百廿斤能剖

金鐵鐫辭示黔首後先地寶出咸陽一權曾繫東門狗

石權二能權百二十斤俱鐵質一嵌銅版鐫詔辭重五

十二斤一環刻兩詔重五十三斤初爲咸陽民間繫犬

物吳清卿尙書得之再歸甸齋鈞權鐫詔奕有神土花暗蝕苔紋新大

魏之權鬱光怪蒐補地志窮山經最後得權更精好三

詔並刻先秦文三權銅質鈞權一刻始皇詔其一刻始

大魏二字八面刻始皇詔作隗即山海經之大隗山節樓賓從觀咋舌似涉鼎

泆探迷津繫昔東游頌功德會稽鄒嶧銘辭闕祇今想

像琅瑯臺詎有風雷護遺刻幾輩親觀上蔡書佐命殊

勛偕綰叔斯書刻石惟琅瑯臺僅存數字近蟬嫣闕采

亦損滅莫辨秦權刻詔皆斯書也

應星躔詮釋蟲魚商破荊驪山冢起朔風哀今古茫茫
向誰說尙書建節雲鶴荆康乾軍略天南置名家金石
燭區宇況復六一工文章權兮權兮爭爲尙書出直欲
併力扶朝綱不然壞寶匿榛莽胡爲效靈修貢絡繹來
公堂書生大言心慨慷願合環球人物歸權量

信陽道中述寄玉簫女兄卽題貞林秋憶圖

汝南晨征雞爛鳴棗林纂纂山重英惟溪曰繡房曰城
閭娵有姊名則瓊豐容盛鬋少年日織素盤花走馬成
鬢予病弱不就傳共姊攤書傍繡檠繡餘展卷覓句讀
少儀內則多昭明先公好文姊侍硯慈母主饋姊治羹

予時小弱得親愛欺姊奪姊姊不爭疾風飈悍慙菱折
載禪復遭乾蔭傾丙秋刲臂療父病七日不食天無靈
天平不死曰有祖願代父職完吾貞十年王母載銜恤
孝娥湧淚漫江亭端居四十若彈指巨靈湘野翹冬青
樓頭打鼓促征權戚串送姊傷齡嬾西上之魚笑比目
南飛之鶴侔孤清繫予操翰姊所喜賞析蘭夜燈熒熒
恥從世俗媚文字每喻古事相盱衡予官不進世已亟
翻看歲歲勞添丁饑驅有婦拙生事共姊計之常有贏
貞林之圖後石室湘流比潔嶽刻銘百年縑素始揚權
如姊豈以尋常名別經申陽感疇昔秋陽十日薶塵纓

述詩行館寄贈姊旅魂背月搖竿旌

寄子大弟

附錄

程瓊

玉夔

次第書來沅澧寒親恩棖觸淚汎瀾花陰寂寂月無
語孤鴈一聲人倚闌

貞林秋憶圖畫者爲姜筠穎生湯開武筱廬蔡新
德民洪汝源毅夫也並附錄題詞九篇十髮居士
記

王闔運

汝南道上春初景晴雨俱秀余三四經過思之恒不
忘也子大於秋時過之獨作貞林秋憶圖奉懷其姊

與陟岡瞻兄有同感焉瞻兄懷父母憶姊懷父母猶
悱惻也男子有外事欲事不能女子乃得代之此其
艱鉅爲何如豈僅平權參政乎今人乃汲汲爲女子
謀外事卽其舍已芸人之性質不負責任之說也近
見吳芝瑛書題頗多已足抵一丈夫歸見此圖重有
感焉女子中大人何必慕男子男子無世用乃欲
援女子自助此與彼鄰不能自立而欲倚中國皆不
值一哂也觀程姊游記猶自謂未展其用故書此獎
之且以告當世議倡女學者知女學已盛也乙卯驚
蟄節記

湯開武

日月不疲明江河不輟流至人耿懷抱鬱此青林秋
蒼狗幻白雲世變無時休豈哉女明道矚俗嗤沈浮
貞孝踐良知得仁復何求覘彼德性堅坐令須眉羞
伊川敦愛敬二難元季傳艱難賦行役陟岡劬遠眸
尺幅擬千里悱惻傳歌謳我生嗟鴈行圖成恣煩憂
擲筆誦景行俯仰空悠悠

楊道隆

小隱居朝市直道原不容屈子被放逐女須晉其忠
泠泠湘江水千載將毋同驅車赴天闕明發感幽衷

中原付禾黍壯志委飄蓬茫茫一四顧皎月含清風
願鳴阮籍琴帝座誰爲通持此一卷圖瓣香當無窮

易順鼎

秋林一帶棗離離有客停車獨詠詩無黍所生明發
意曰嗟予季陟岡時湘砧已作申申響魯緯還抽乙
乙絲寫入畫圖傳萬古他年補入武梁祠

冒廣生

沈沈瀟水湘煙地終古如聞喚女嬰馬上青袍行未
已江干黃竹淚先枯百年多病嗟身世萬里悲秋入
畫圖見說天涯懸老眼一封書到大雷無

胡思敬

貞林志節如箕穎唐德雖尊未敢臣說到情根應洗
耳雪衣娘子是前身

曹娥江上草離離聞說中郎有斷碑兩字色絲誰解
讀過庭媿煞蔡文姬

胞姊

朱程珏 玉雙

圖畫相看似舊時杯捲風木有餘悲平生貞孝天應
許不賦尋常薄命詞

棗林楓葉照秋晴予季天涯愴遠行莫向江亭話游
跡一繩霜鴈咽離聲

興中紀夢

行夢常苦短臥夢常苦長身同夢則異所異客與鄉我
興夢亦便跼若三尺牀偃仰頗自適侵晨下茆岡山花
映油幪溪月留枕傍路隨魂遠近狀與山低昂神游契
鵲渚舊館來鶯坊婦子嬉出室車馬闐就廊謂言吾暫
歸途飽不用漿已復過湘廬蟹熟籬菊黃晤譚京國事
兄姊各扶將橐金告無餘取官差自償衝飈倏驚寤磴
轉車雷碾指眼行復迷自笑復自量秦夢貧莫追楚夢
賤莫當敢以告僕馬夢顛興汝防

平靖關趨信陽二首

七載羈裘去復還中原飛輓幾曾閒數殘歷歷關門樹
送盡青青楚客山鐵騎已穿冥阨外輶車猶在嶮巖間
憂時睥睨無長策空許巖花照鬢斑時鐵路出武勝關而轉餉仍賴夫徭
驛樹清秋掃蔚藍愁看壞磴走驚驂中州文物追何李
大楚雄風失子男十里荒塍吞澗水數家殘屋倚茆庵
淩晨莫漫嗟行役重聽村雞到汝南

九日憶兄姊

行行九日關河莫冉冉中年骨月恩無酒無花任悲憤
不風不雨易秋昏店臨殘堡聊相問山入河流不敢吞
寄語南來數行雁駢程今過柏人村

九日遂平示趙客周生

天公驅雲作重九飛傍馬頭常疾走回看冥阨萬重山
頽霞猶挂關門柳白酒紅螯野店煙時平最愛汝南川
插花邨女駢鴉髻懸瓠軍聲散鴨田肩輿搖兀還多夢
褻輕更參瓶甕重古驛詩人明月篇長房市上茱萸頌
饒愁幾度逢佳節龍山閣澹乾坤色未知何地落烏紗
直待鑾輿返京國金精耀怒秋無羶邨童拍手笑且吟
不教風雨醉重九何人補卻天無筵驚蓬碾沙闌路細
大車壓入城將閉絲楊堠館自悵悵尙作春邊往來翠
趙客周生聯騎頻重陽何世不愁人中原平地古宜客

那要登高方見身

楊花詞九首

漢南春好記藏鴉
伏雨闌風冒帽斜
從道楊花多薄倖
那知春更負楊花

寶釵樓下水迢迢
褪盡風前舊舞腰
省識湘春初種日
八年來挽最長條

千金築隄不種柳
祇種楊花廿一株
苦被官程催去速
短長亭畔一情無

李花春好要扶持
卻礙楊花撲面時
昨夜夢迴私懺惡
東風庭畔有誰知

平生不賦無情物暮雨樓心暗聽琴卻恨楊花無氣力
攪愁飛不到樓陰

六月炎風趁午燒碧楊深處一停簫行人莫唱纏頭曲
定後風波去後潮

楊花天際盪豪情不受人憐遠恨生誰負龍團三百餅
窺簾來喚賣茶聲

入座楊花與李花風前對舞不天斜髡枝宛宛垂三徑
綠葉陰陰自一家

冬雪簾櫳憶北征楊枝休鞦韆畫樓傾一般老大關情處
願祝楊枝有再生

亂餘風偃髮同上望京樓宮館斜陽出牛羊野市收菊
罇遲病客羈羽夢皇州嚮夕長林夔倦懷何所投
老子祠邊待懸愁日已移雨中淇樹色馬上太行詩堠
館聊相訊川原忽異時王風嗟蔓草吾道欲何之
蒙病在庚子國憂相與深敢矜狐鼠嘯那恤虎狼臨奇
絕中朝局哀哉鈞軸心餘生經蹕路衰柳絆朝簪
聒耳矜輿誦平肩捧至尊躋危經華曲浩蕩過夷門冠
蓋仍行列戎夷合俎罇麋官吾媿爾懷疏隔天闔
地似南巡舊人懷西狩歸行宮添樹少輦路讓花飛纂
懿高光烈依稀帳殿圍聖明翻罪已讀罷涕長揮

法從連漳衛萊衣擁翠華兩京收不戰四海望能家
臘伏青蒲席仍驅紫色蠅中興由豆粥嘗膽企風沙
家法繇來儉皇仁本自寬開帆虛殿腳駐蹕偶衙官
豈意牽裾恨終勞漏網搏輟朝悲一老省識外交難
乾坤自不隘我馬況虺隤痛定殷仁墓愁登魏武臺
橋危沙怒齧堞轉嶂橫開莫問南陽事前星已晦
霾旭日蕩陰里衣塵拜岳祠兩宮還有幸三字獄何
辭破暖逢南鴈歆霜尙北枝衝冠餘髮短蕭颯倚闌
時博涉春秋義行歌鄭衛墟甯知今戰國不是古皇
輿道喪來妖孽人亡感聞餘鄴城聊息鞅覆轍數前
車

銅爵臺

香履拋殘日易曛西陵聳望究何云一丈五尺肖神爵
七十二處空疑墳大命尙勞頒九錫小喬不鎖定三分
榻來片瓦徵刀筆誰似阿瞞父子文

黃梁驛

邯鄲大道柳婆娑不見當年挾瑟歌厮養嫁猶窺鏡比
盧生無奈枕頭何行宮樹色鴉邊冷古驛砧聲鴈外多
忍待明朝炊飯熟夢中檢點舊山河

叢臺

輓道清秋接叢臺匹馬臨但教胡服易未遂國人心歌

舞甯知淚憂危說到今霸圖空自許橫覽一羈襟

沙河

臨洛直北望秋色黯征軺沙濶人俱細橋危馬不驕有
亭天漠漠不住野蕭蕭紆軫尋唐墓顏碑字未凋

功名

功名屬黃霸詞賦慕相如竟以他涂進多慚報國疏骨
求燕市駿書寄武昌魚幾輩安危略浮生睥睨餘

羣馬

落日一夫長清秋眾馬奔迸蹄貪草短隔目鬬沙昏市
駿誰爲價戒龍孰紀恩金創殊未裹萬里近君門

濡跡中原日秦方已絕倫失羣誰縱汝少秣僅能馴汗
浴桃花雨關連苜蓿新笑予方馬走渴飲畏風塵

憩圓津庵

內邱南三十里
方恪敏公建

中邱多迴颿廣漠鬱崦景始冬川未梁似月沙切嶺崇
深構蘭若迴睇憇修軫松風鳴軒琴篴翠合亭暝鴉路
越可招鷁榭間亦整相攜剔苔碣曼立就幢影枰殘僧
方塵梵禽猿未省言攀東岡雲勢與西塢並山河日以
遠賢喆日以迫纓塵不我濯津筏聊相引開牖晞髮眠
閒輓寄俄頃

眞定

卷二
三
郊亭麥飯睇王畿策馬滹沱送夕暉河觸鴈門千里入
佛高龍藏四洲稀股肱舊日雲山郡羽葆經年校獵歸
老我輪場困奔走恥從裘馬較輕肥

望京四首

二十萬金輪少府三千里路近京華詩聲浩浩常隨馬
風色茫茫迫噉沙涿鹿妖旗曾避鏑來乾胡騎共鳴笳
幽州豪士莫辭飲燕女當壚顏似花

黃葉打頭秋不羈眼中宮闕鬱佳哉元皇恭儉應無失
燕國屠沽亦號才畫閣羽書封譯館夜驚宮燧出瀛臺
畏途遙睇雲霄迴篝火祠深萬乘來

玉竦金鰲吹夕波相看痛定憶灤河
顯靈宮裏紅燈出
市駿臺前白骨多
暫醉腥膻能洗甲
歸歟仗隊簇鳴珂
百年幾度中秋閨
卻爲關山照綺羅

蛇豕津門戰壘移
雞鳴風雨谷王知
逍遙劍履過三輔
潤飾苗干匪一時
破碎圖書悲獵火
圓明草木黯宮祠
于今舊錦關新命
莫畏繁霜損鬢絲

次韻題旨辟疆先生菊飲詩卷贈鶴汀刑部二首
捲幔秋心黯草堂
陶公閒醉阮公狂
百年老去有詩卷
九日歸來非故鄉
霜澀擁幰嫌酒薄
風彊掃徑偃年荒
江山文藻都消歇
曾說豪情比孟嘗

靈鷲小印墨籠塵返壁年時哭故人

卷爲江建霞藏贈鶴汀

有美

一人成憶語號三公子竟能貧雉皋池館秋如昨燕子
河山跡已陳展卷金門話乘海一番朝市未全新

歲晚有別

歲晚天涯復此行看花有淚不題名燒殘蠟燭憐心短
彈斷琵琶怨指生船趁風濤蛟蜃窟觚棱冰雪鳳凰城
籠燈記取消魂夕曲巷雷車走恨聲

行行歌罷重行行私錄惟應記小名頻向西洲聽蓮唱
那知東海有乘生珠簾繡柱人如畫盾鼻弓衣雪滿城
玉水臨牕照梳洗梅邊么鳥變唬聲

題王弼甫京卿秋燈課詩圖

君母盧太夫人有焦尾閣詩集圖爲趙鵠

叔畫亡去七年得之鄭蘇齋觀察

焦桐閣畔雨瀟瀟曾抱阿侯錦字挑天水圖存驚返壁
北江燈影憶垂髫庭前秋畫悲遺訓夢裏機聲喚早朝
競識范陽賢母德迴文天寶盛風謠

贈別湯筱廬工部卽題其戎馬平生小影

三十功名五十違中原狂雪打頭飛賓鴻歷歷長安寺
匹馬蕭蕭短後衣老去郎潛詩興好竭來京洛畫師稀
歲寒抵掌饒歡會舶趠靈風送客歸

贈陳舉人忠盟

陳侯好飲鬱奇抱賤子當官無好懷一笑題詩側理紙
十年走馬長安街舞我虬枝鐵如意遺爾虎文金鞞靴
海山神風吹髮白人生富貴誰安排

歲除歸示家人

狐奴磧外朔風飛萬里溟鵬十日歸佳卜喜停籠臂釧
香盟寒驗枕頭衣尊中柏葉歲新舊笛裏梅花春瘦肥
昨夢江程阻江雪居然兒女一鎧圍

石巢詩集卷三

甯鄉程頌萬子大箸

題李文石任城紀游圖八首項文彥畫

泮水讀碑 圖中古柏翳然

策馬宮牆近雲搏羽葆青苔衣扶輿顛風鬣動櫺星故事歐陽錄高名厯下亭清秋接塵鞅一爲看碑停

東郭尋泉 泉在州城東傳爲太白浣筆處怪石離立有亭屢葺屢圯

客似山東李奇探郭外泉蒼然廢池木不繫酒家船遠墅鴈衝暝斷橋人語煙摩挲頑石在媧恨補何年

蕭寺聞笛 君與鐵塢寺僧復初善僧忠親王
報恩寺在其東扁不數武

西鳥語鈴塢北斗在僧堂鐵色太古偈笛聲今夜涼坐
譚花雨寂行度竹廊香太息鄰鐘動深悲異姓王

酒樓晚眺 太白樓在南城之顛運流經其下
黃濟背城流蕭蕭太白樓酒邊龍過雨詩外鴈橫秋濁
世無今古浮生有鷺鷥蒼茫期散髮何許弄扁舟

南塘泛艇 卽杜老南池出舊南閩半里許望
池心亭風物佳絕

舊郭對池心南塘乍可尋煙衝翠羽出花合妓船深秀

色開齊魯詩王自古今羈愁頻讀畫煙水愧華簪

杜祠攬勝 杜文貞祠在南塘詩所謂城隅集
小船是也

斜日濟南祠人傳杜拾遺關山飛海水行在但歌詩樹
獨棲鴉少蘆深去槳遲寒窪忍飄泊那與大鵬宜

紀城訪古 春秋紀侯大去其國謂卽鄒邑之
聚按紀國應在今之壽光縣不應在鄒或漢
濟陽城土人誤傳也君於此得遺戈銘字奇
古不可辨予十四年前曾過鄒謁孟子廟

喬木黯平墟遺戈蔓未除從君攜醢地記我訪碑餘鳧

繹絃歌接春秋特筆書風塵驚鬢短十載訊居諸

寄廬讀畫 君與項幼平善幼平爲卑官濟甯

與之游者比之黃司馬易其畫不輕爲人作

所居瀕河水木明瑟

卑官何所恥吾愛項山陽水竹署亭長琴書生晝涼
眉憐石季青鬢與君狂縑素宜珍惜浮生永寄將

題海東訪學圖送捍鄭

文章風月炤三吳酒暖春江盡一觚且喜鸞帆吞日近
敢忘龍戰倚天孤神槎自載詩書氣海客應摹笠屐圖
萬里東行我西笑鶴樓搔首更相呼

送瞿方梅下第爲桃源校長三首

一第艱難兩鬢絲，楚雲懸淚解帆遲。
春邊冠帶鶯衙散，夕照河山燕壘支。
燈幌呻吟刪舊稿，庭蒿商榷悟新知。
漫評雲物從休取，醉江樓更一卮。

年時學道漸忘貧，花裏巖扉待訪秦。
別久賸看詩進否，身窮還與世相因。
有官笑我勤終拙，辟地憐君嬾是真。

一十五年門館罷，中丞賓從二毛新。
時浙撫張小帆中丞過鄂生爲其守

永順時所得士且命從予游

身外浮雲好自憐，國憂頻歲見桑田。
雨昏楚塞江連屋，春老吳船浪拍天。
家法每從經術問，客談應當史書編。

別懷棖觸仙源渺山下蒙亨定有泉

淮舫宴集同詩孫次蘇盦韻

白髮春期黯清游逸興窮酒寒銷燭外花雨過船中琴
操師中岳經畬訪邵公十年相見喜擲盞莫書空

題李藝洲年丈慕萊堂圖

丈人躬仁風守瑯駮奇服孰是簪組勞而忘古今燭臨
江擁畫舫蒙山翫高躅祥暉鑑堂廡至養敦帛肉承顏
日以負勝寄理可卜層層苔繚垣鬱鬱松蓋屋攬事崇
古歡披圖眩今日讚儼武梁徵書還楚寶續京塵撰杖
餘巨冊炳可讀十道雲鶴翔百年天藻縟風標諒移忠

膏雨期易俗繫公孺子慕增我鮮民酷循陔暫什蕪清
道王騶屬羈羽促南雲微生爲公勗

次韻伯嚴招飲秦淮

斜陽猶戀雨花臺歌哭春陰闕晚雷無恙一泓天下色
有涯雙槳故人來劇憐睥睨逢花晚未必乾坤送此才
寥落平生悵湖海留歡且覆掌中杯

淮舫次伯嚴韻眎恪士

丁簾籠鳥自梳翎二月秦淮柳未青笛外風來波瑟瑟
燭邊春好意亭亭詩愁忽訝乾坤隘倦客欲歸風雨冥
莫向石城呼艇子有人舉箔待春星

海舟次韻羅達衡

神槎何處問蓬瀛
一夕移舟萬里情
龍沫帶腥吹海立
鯢身如髮向天橫
雕樓隔塢添潮暈
島日敲冰作戰聲
楚學十年同調少
鵠原風雨憾平生

君兄邪峴
今春逝世

申江別子樸游杭玉簫先在卻寄

覲處在一室背面卽千里
況乃同根蓬驚飛不相俟
贈君雙革鞜去涉楓涇
沚楓涇望錢塘停船寤
阿姊六橋新荷重三竺
雲樹倚湖娃嬉迴撓語
待新客子帘飄鶯昨舌
枕轉魚鱗尾白石賢可
招青波影嵌底我昔夢
游杭無處印屐齒惟餘
詩撐腸勝攬負在咫飄
飄京國去

好句那可擬請偕還故巢述景爲僂指勞思不我廢望
眼洗雲水

同石遺伯諒叔由重伯士可鶴汀厰肆酒樓

直水不作冰直木不用繩九衢皆直道誰與曲者昇志
士覷掾時達人畏多能同時作者七蟲世悲填膺清畫
多飛埃招攜上孤層頽廊日不滿近突煙方升沾雖燕
市賤量匪江鄉勝迴頭望閭闔大笑聲慚蠅不歸疇故
吾畫壁呼可磨坊稠書易迷厰闔車又增一笑各分去
天游胡弋繒

送石遺還武昌

第三
三
薊月懷照人海風驅若塵一身窮走藏難與青天分青
天但分影影併如一身君情皎如月照我衣裳親衣裳
不可泮驅塵海邊斷去去江路長行歌不妨短

黃埃引贈重伯

黃埃蔽天白日赭短衣何官來闕下翰林一品令公孫
當年乞郡胡爲者君向潯梧倚畫船我方說劍鶴樓前
懷人風雨雞鳴夕傳檄文身百粵天幡然匹馬偵留後
落拓錦袍看北斗國步還嗟西狩麟朝衣幾哭東門狗
我時病榻臥江皋君復樓船下京口收京不戰兩宮還
笑君挾策方狂走金門召試君不辭下殿與君同聘貽

吾皇手攬中興策二十七子颺連騎併名比謀三百七
百八十人同珥筆雙陳鍛羽鳥雲迴冒魏懷才並王易
兼旬楊宋在人口歐九迴鞭笑相揖散轡車載出橫門
爾我還爲二千石南河亭檻薰風涼我來置酒君坐牀
高譚健啖晚朝市故人別去新人強廢壘喬柯弔駢陌
萬柄風荷黯秋色闔樓灰燼淀園新座客能言庚子賊
一別京門萬事殊炎官火繖摧冰車文章價賤官亦冗
街行卻避紅巾胡長安橋東失雉堞玉堂戰鏃薶平蕪
公孫不復玉堂趨日命朋酒相歌呼櫻桃斜街烏啄屋
琉璃廠肆風翻書我昔佐談湘綺翁哭庵與子皆仙童

才名睥睨二十載酒懷散作青冥鴻上書伏闕論大計
公孤口贊心不容哭庵備兵到五管子復流轉燕郊達
酒杯白刃等閒耳人生那得顏花紅走也南州主強學
五年暫得賓徒樂相思卻畏人海來船趁連朝北風惡
世事浮雲一搔首奉錦龍蟠更誰守休論俄日互徵兵
勸君且對文君酒酒釀花濃局又新翩翩燕鴈各風塵
明朝策蹇津門去海色茫茫愁殺人

六月十三日期味丹叔由觴同人於南河泊會者
四十予以疾謝座客四首

側帽來京國池亭有是非檻荷衝鷺入城柳背鴉飛野

色誰賓主鄉心負
薜薇幾年烽火別
醺酒對山暉
船趲三千里旗亭四十賢
收京纔幾日打槳問徂年
笑拂桃笙簟翩宜藥玉船
諧譚過亭午聊當史新編
陌望銅駝晚橋連玉竦
春相看文字飲何似道咸人兆
朕誰知魏風煙曩過秦飛騰望諸子
慎護百年身
一榻勞花想慚予病渴深
室冰晨滴漏牕籜晚鳴琴亦
有寥天思終非鴻鴈音
遲徊幸多酒歡賞謝朋簪

次韻送士可游居庸

挾策龍川子詞鋒世莫當
行塵遇京國衣鬢各蒼茫
價豈燕臺重風原楚學強
躋邇識天步去住不須量

世已饑方朔時還靳馬周王風吹髮勁聖水挾詩流孔
墨功誰並元黃戰未收且容探稗乘策蹇向邊樓

無題二首次鶴汀韻示士可

野亭香塚問陶然儂汝行程不隔船翻笑藥犇來月裏
幾陪花想在燈前裙拋鳳子臨分地簾卷龍鬢欲雨天
莫漫旗亭賭先唱流觴還倚竹林賢

貪看五色煉河車爭嫋鬢花侍玉除龍種未收西極馬
鸞刀先贈武昌魚珍珠密字勤相認荳蔻梢頭恐未如
近海炎歊倦梳洗繩牀閒誦茂陵書

贈胡眉仙主事二首

執戟郎官白紵輕徂年劫火話昆明夢中彭蠡鴈行到
別思蘆溝秋水生漫學屠龍傾海客翻勞繡虎動公卿
愁來怕聽新蟬曲天末樓臺引玉笙

冠帶逢君早放衙關山岬兀笑徵車一宵照鬢翻嫌酒
十索驚心豈爲花遼海幾年人化鶴匡廬何日客移家
飛騫世事徒銷黯獨對昏燈檢夢華

次韻王爵三見贈二首

射策金門三百輩何人前席漢文皇平生只合牛馬走
與子共尋魚稻鄉碧月停梭勞織女白雲題署豔仙郎
文章楚寶輸君健莫污衣塵兩鬢黃

集三

八 鹿川閣

九門宮樹鎖寒蕪消息鴻龍不可呼
失喜風花能避劫依然飲食賤爲儒
攜尊韓孟聯吟地脫帽荆高舊酒徒
促別來朝津鼓急沙帆歷歷度檣烏

閒堂八首

滄江無路泛仙槎閒向東京數夢華
人海十年雙淚落半留添酒半澆花

顚顚花邊舊酒狂每來京國看殘陽
不開笑口知天惱閒鎖愁眉妒月長

芳樹籠燈月二更停杯相顧若爲情
無端海思催人急逆捲琵琶作戰聲

舊游閒憶道州何詩索畫凭肩幾按歌今日四雲寥落

盡更誰拋髻唱黃河

菊部閒愁賦惱公貞元朝士憶誰同淒涼萬古愁邊曲
那得歸奇玩世雄

梅邊消息鈿車遲幾筆湘蘭本事詩烽火未妨花短命
興亡休笑鬼無知景和肖芬庚子亂後歿

五侯第宅新巢燕十刹亭臺舊倚虹我獨何爲損霜鬢
依然來坐落花風

英雄兒女恨分明王母前頭記未清自是人心有奇癢
敢因鞭背惱方平

叔由赴舉以宋姬舍予鄂邸既成進士共予徵赴
京師徂秋欲先歸家故有三姬戲柬六首

鴛槳平湖濫客槎
鵠來孤騎又京華
合歡堂裏宵飛夢
寶相晶屏四照花

交親老大各詩狂
留取桃根住漢陽
一月障泥催計吏
歸期柳綫覆樓長

榜花待放月三更
蟾子釵梁別院情
朋酒客途眞福喜
泥金報叶按歌聲

八斗論才繼長公
中實樓臺花萼影相同
不爭繡斧關山
道白石紅簫已自雄

登第添丁兩事遲珍珠密字妾郎詩昨宵喜動眉梢翠
莫遣人間鏡聽知

尹邢眉譜自分明暫別桃笙倚玉清可要東方歸遺肉
易園春未已華平

題金匄丞勘書圖送還浙

江渚歲云暮送君天一方懸知風雪外尙有讀書堂鳥
背松巢冷僅寥月幌涼郎潛歸自喜身世託文章

送陳善餘還丹徒二首

強學睠吾子五年無一詩江艫衝雨住庭燭上花遲六
籍開生面羣言有導師書成各將去驚座認鬢眉

三
權返銅官渚家遠鐵甕城春秋長儻忽飲食倍崢嶸制
海權何在譚天劍有聲滄洲吾媿爾何許濯冠纓

題匄齋尙書嵩山廟石人拓本頂有馬字旁二畫
髣髴作馮字

髣髴神人跡低迷少室雲三花不可見何處更逢君纂
姓非馮寶鐫名笑馬殷節樓清讌夕述古仰高文

題匄齋藏歐陽文忠三游洞題名拓本三首 景

祐四年七月十日夷陵歐陽永叔丁元珍來黃
仲弼學士訪得按公年譜以景祐三年五月謫
令夷陵自京師沿汴絕淮泝江奉母夫人赴貶

所十月至夷陵四年三月謁告至許昌娶薛簡
肅公女九月還夷陵十二月移光化軍乾德縣
令則四年七月公實不在夷陵題名當是四年
十月今細審七字筆畫有變當亦如元珍二字
爲後人妄加刻畫耳又書夷陵而不稱令亦疑

文可辨

薛壁三游洞茶經第一州江山有遷謫文字鬱雕鏤至
後客仍喜歸時猿正愁壺觴三峽外今古幾清游
泥雪懷東寺梗枏植北軒偶忘身是令相約客呼猿林
籜空城晚龍蛇斷壁昏先憂偕幾輩文藻照乾坤

此日夷陵俗何如景祐時尙書集古錄學士訪碑詩寂
寞臨邊郡蕭條曠代思荔蕉無可薦風雨闕靈祠

黃庵頌菊贈如滙兼示飛俠公勇

黃庵好書侔好色座有好花兼好客經時種菊大如槃
金翠離披映書策貧孟不貧肩有經酒陶止酒腰毋折
人言菊瘦似秋冷我道花開較春熱連朝小圃帶經鋤
樂與閒巢支歲月菊觴如海花如銀衝飈卷江江晝昏
星星黃溜忽滿眼瑟瑟白衣來扣門漢皋花市論嫵姵
共到黃庵問花價但逢花候有人來卻恐人來拗花謝
吳江霜觴相磨挨移花晚背船篷開菊叢欲別不忍別

一日醉倒腸千迴楚魂越豔誰猗娜祖帳攀花對花坐
幾人行處惜年芳且嚼秋英抱秋臥華陽子十髮翁舊
山何處煙嵐通願作東籬自生菊不勞採掇夸人工黃
庵醉後人毋哄黃庵去矣花相擁分飛一夕大江東樓
前更有黃公勇

題畫贈李小石二首

君家鴨綠江邊水東去榆關一千里北風吹客向中原
一髮江山認揚子揚子潮生月倍明笛聲悽黯武昌城
江樓作客猶如此辛苦遼陽說辟兵

大江如龍山似馬咫尺江山不能寫豪狂誰似李公孫

醉來散髮江亭下燕子斜陽是等閒
清秋寥落幾漁竿
孤鳴獨笑黃州鶴散浪無過白下山

次韻奉酬左庵按察

省掖高名領奏牋又迴驄馬別湘川
東華軼事珠塵記
南部妍詞井水傳
政肅幾曾門若市
詩狂欲挾浪吞天
每懷青瑣滄江晚琴鶴相依藉月眠

次韻題冒辟疆畫 子樸藏高二尺五寸廣一尺

一寸款署壬寅初秋樸巢老民寫於水繪園之
西軒詩曰無主茆亭傍水隈
環江曉霧構天開
舊游徑向叢蕪認前度人疑隔世來
雲樹經秋

如病鶴石橋咽浪激奔雷最憐衰草殘陽裏牽
引江南庾信哀是歲辟疆里居年五十二康熙
元年也

新亭秋色接江隈樹與人家劃不開却外乾坤雙鬢短
尊前江海幾人來巖腰屐路蘊雲腳澗底琴聲轉瀑雷
三百年來見豪素故家喬木祇餘哀

琅邪大道曲

琅邪大道青青柳不敢藏鶯爲避風底事相思不相折
倚樓擡眼望春驄

襄陽大隄曲

女兒花肉映章臺雪白江梅相向開
燕嬾鶯愁隄未隔
幾時重訪四娘來

題匋齋藏王蓮心畫二首

閒滌朋尊覓道書松溪西畔野人居
湘花湘草依然在
一十年來鬢髮疏

婁東畫筆繼諸王歸向岫巖築養堂
莫忘舊時醫國計
禹糧多處問瀟湘

次韻題黃仲弢叔頌兄弟手拓黃山谷游三游洞
紹聖二年三月題名三首

艤舟來自黃牛峽刀筆三游紀勝緣
霧結煙霏數行字

春期何似永和年

鮮庵學士訪碑餘蘿薜巖扉徑路紆八百年來見椎拓
峽雲中斷雨晴初

弟兄前後嘉游續雙井宗風繫客思

三游洞石刻有白香山與弟行簡及

元微之又東坡子由及山谷茲拓山谷題名偕兄伯元
紹聖鐫名久寥落巖前焦
筆更誰持

石巢詩集卷三終